



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno MCXVIII. ad annum MCLXXIX.

Parisiis, 1644

IX. Ecclesiae licite potest sub conditione donari.

urn:nbn:de:hbz:466:1-15588

ANNO CHRISTI 1179.
 taris administratione præcipias abstinere: & exinde liberum ei sit, officium sacerdotale exercere.

CAP. VII. *Idem Verulano episcopo in eodem libro 1.*

Quod te cum inimicis tuis, &c. De cetero quia fraternitatis tuæ quærit industria, vtrum clerici qui infra subdiaconatus ordinem constituti, quia continere carnis vitio coacti non valeant, vxores accipiunt, ecclesiastico spoliari possint beneficio canonice: id tuam volumus experientiam tenere indubitata veritate, quod cum sint voluptatibus & carnalibus desideriis dediti, ac diuinis & ecclesiasticis sacramentis contrectandis indigni, ecclesiasticis sunt procul dubio beneficiis priuandi. Sane si ecclesiis quibus attulati fuerant, de possessionibus aut aliis bonis suis aliqua contulisse noscuntur, cum ab earundem ecclesiarum ministerio fuerint & beneficio sequestrati, ad ipsos recta via dominium & proprietas illico debet absque vlla contradictione redire.

CAP. VIII.

Idem iudicibus Vellenen. in eodem libro.

Relatum est auribus nostris, quod cum ad vestræ discussionis examen aliqua super testamentis ecclesiæ causa deducitur, vos secundum humanam, & non secundum diuinam legem in ea vultis procedere: & nisi septem aut quinque testes idonei producti fuerint, omnino non proponitis exinde iudicare. Vnde quia huiusmodi de iudiciis ecclesiæ non secundum leges, sed secundum Canones debent tractari, & in his diuina scriptura testante, duo aut tres idonei testes sufficiunt: discretioni vestræ per A. S. mandamus, quatenus cum aliqua causa super testamentis ecclesiæ relictis ad vestrum fuerit examen deducta, eam non secundum leges, sed secundum Canones, iuxta decretorum statuta, tractetis tribus vel duobus legitimis testibus requisitis: quoniam scriptum est: *In ore duorum vel trium testium stat omne verbum.* Deut. 17. Matth. 18.

CAP. IX.

Item præposito & canonicis Sulcan. in eodem libro.

Significatum est nobis, quod ecclesiasticam sacerdoti

præbendam vnam in ecclesia vestra communi consensu & voluntate dedistis, ita quidem, quod Missam de sancta Maria, nisi sit corporis infirmitate grauatus, debeat quotidie celebrare, qui ecclesiam vestram non nisi communi tam præpositi quam capituli consensu, potest dimittere, nec cuiquam præbendæ illius anniuersarium delegare. Quam siquidem constitutionem eatenus confirmauimus, vt prædictus sacerdos ecclesiæ, nisi infirmitate corporis fuerit impeditus, assidue debeat officium suum impendere: & quanto feruentius potest, salua honestate sua & debita deuotione, Missarum solennia celebrare: nec sibi liceat hoc, illinc se ad aliam ecclesiam tranferendo aut voluptatis causa subtrahere.

CAP. X. *Idem Beluacensi episcopo, in eodem libro.*

Significatum est nobis & pro certo monstratum, quod Griboldus nondum incipiens esse quatuordecim annorum, timore magistri, qui eum literis erudiebat, habitum religionis suscepit in ecclesia de Ruffinis, & inde sicut puer infra annum exiuit, & per sæculi vanitates iam sex annis & eo amplius vagabundus discurrit. Vnde quoniam huius rei veritas nobis non constat, fraternitati tuæ per A. S. mandamus, quatenus rem ipsam diligenter inquiras, & si inueneris, quod non fuerit a parentibus oblatus, nec incepit esse quatuordecim annorum, quando ad religionem accessit, & eum infra quartumdecimum annum voti pœniterit, & ab ecclesia recesserit, si in sæculo voluerit remanere, & eum ab ipso voto quod fecit auctoritate pontificali absoluas, & eum absolutum tam in ecclesia de Ruffinis, quam populo tuæ ciuitatis studeas publicare. Si autem a parentibus suis forte oblatus, seu quartumdecimum annum compleuerat, cum religionem intrauit, siue post quartumdecimum annum professionem a se factam ratam habuit, eum ad eandem vel aliam religionem transire, ecclesiastica districtione compellas.

CAP. XI. *Idem Salabriensi episcopo, in eodem libro.*

Peruenit ad nos, quod cum tu Rog. filium VVilhelmi ecclesiæ tuæ canonicum, vt debitam in eadem ecclesia residentiam faceret, monuisses, ad audientiam nostram in
appel-